

UCH YOSHLILAR


Olmaniyam
G'ajiyman,
Holvaniyam
G'ajiyman...

Dema nechta
Tishing bor?
Seni nima
Ishing bor!?

BUGUN BAYRAM

Ichib olib
Choyingizni,
Minib chiqing
Toyingizni.

Minib olib
Toyingizga
Gul opkeling
Oyingizga.



OBBO, KALAMUSH-EY!

Kalamushvoy,
Kalamush,
Savoding sal
Chalamish.

Yoz desalar
«Temir» deb,
Sen yozibsan
«Kemir!» deb.





KELINPOSHSHO

Mushuk bibi
Miyov dedi.
Menga qarang,
Kuyov, dedi.

Bozorga tez
Borib keling.
Shirin sichqon
Olib keling.

CHIRMANDA QO'SHIG'I

Yum-yumaloq qasqonim,
Bak-baka-bum.
Bo'ynimda mis marjonim,
Bak-baka-bum.

Menga tushar shapaloq,
Bak-baka-bum.
Siz otasiz shataloq,
Bak-baka-bum.

BAQA QO'SHIG'I

Egnimda ko'k ko'ylagim,
Vaq-vaqa-vaq.
Oldimda toshoynagim,
Vaq-vaqa-vaq.

Kulcha ekan yuzlarim,
Vaq-vaqa-vaq.
Shahlo ekan ko'zlarim,
Vaq-vaqa-vaq-ey!





QANDDONGA YOZILGAN SHE'R

Toshoynakka bir qara,
Tasqarasan,
Tasqara!
...Ichingda qand bo'lganda,
Qilmas edik masxara.



MANTIQOZONGA YOZILGAN SHE'R

Hammasini biz yedik,
Senda manti pishirib.
Sir boy bermay turibsan
Bo'sh qorningni shishirib.



TUSH KO'RIBMAN, OSHNA...

Och chumoli
Itni yedi.
Tangabaliq
Kitni yedi.

Seni esa
Burga yedi.
Ustingga yog'
Surkab yedi.

